

PWYLLGOR SGRIWTINI CORFFORAETHOL

Cofnodion y cyfarfod a gynhaliwyd ar 3 Chwefror 2014

- PRESENNOL:** Y Cynghorydd Gwilym O.Jones (Is-Gadeirydd) (Yn y Gadair)
Y Cynghorwyr Lewis Davies, Jeff Evans, Jim Evans, Ann Griffith, Victor Hughes, Llinos M.Huws, Peter Rogers
- WRTH LAW:** Prif Weithredwr
Dirprwy Brif Weithredwr
Pennaeth Swyddogaeth (Adnoddau) a Swyddog Adran 151
Cyfarwyddwr Cymuned (ar gyfer eitem 4)
Cyfarwyddwr Dysgu Gydol Oes (ar gyfer eitem 3)
Pennaeth Dros Dro ar gyfer Gwasanaethau Democraidd (ar gyfer eitem 6)
Pennaeth Gwasanaethau Plant (ar gyfer eitem 4)
Rheolwr Rhaglen a Chynllunio Busnes (ar gyfer eitem 4)
Rheolwr Refeniw a Budd-daliadau (GJ)
Arweinydd Tîm Iechyd a Diogelwch (SN) (ar gyfer eitem 4)
Pennaeth Proffesiwn (Adnoddau Dynol) (ar gyfer eitem 4)
Cydlynnydd Absenoldeb Salwch (AR) (ar gyfer eitem 4)
Rheolydd Sgriwtini (BS)
Swyddog Pwyllgor (ATH)
- YMDDIHEURIADAU:** Y Cynghorydd R.Meirion Jones (Cadeirydd), Y Cynghorydd.H.Eifion Jones (Aelod Portffolio ar gyfer Cyllid)
- HEFYD YN BRESENNOL:** Y Cynghorydd Ieuan Williams (Arweinydd y Cyngor a'r Aelod Portffolio ar gyfer Addysg) Y Cynghorydd Alwyn Rowlands (Aelod Portffolio ar gyfer Trawsnewid Perfformiad, y Cynllun Corfforaethol ac Adnoddau Dynol) (ar gyfer eitem 4), Mr Hywel Jones (Prif Weithredwr Mudiad Meithrin) a Carys Gwyn (Mudiad Meithrin) (ar gyfer eitem 3)

1 DATGANIADAU O DDIDDORDEB

Gwnaed datganiad o ddiddordeb rhagfarnus gan y Cynghorydd Jeff Evans mewn perthynas ag Eitem 8 ar y rhaglen ynglŷn â gwybodaeth yn Atodiad 1 yr adroddiad ar yr eitem dan sylw ac ni chymerodd ran mewn unrhyw drafodaeth ar y rhan honno o'r adroddiad.

Gwnaed datganiad o ddiddordeb personol gan y Cynghorydd Ann Griffith mewn perthynas ag Eitem 8 ar y rhaglen ynglŷn â gwybodaeth yn Atodiad 1 yr adroddiad ar yr eitem dan sylw.

2 COFNODION

Cyflwynwyd cofnodion cyfarfodydd blaenorol y Pwyllgor Sgriwtini Corfforaethol a gynhaliwyd ar 9 Rhagfyr, 2013 ac 14 Ionawr, 2014 a chadarnhawyd eu bod yn gywir.

3 DIWEDDARIAD GAN Y CADEIRYDD

3.1 Mudiad Ysgolion Meithrin - Cynnig i Ostwng Cymorth i MYM a Chymdeithas Cylchoedd Chwarae Cyn-Ysgol Cymru (Y Gymdeithas)

Dywedodd y Cadeirydd wrth y Pwyllgor fod cais wedi ei wneud gan bedwar Aelod i'r mater uchod gael sylw yn dilyn pryderon a fynegwyd mewn perthynas ag un o'r cynigion ar gyfer arbedion a gyflwynwyd gan yr Adran Dysgu Gydol Oes fel rhan o'r ymgynghoriad ar Gyllideb 2014/15 ac fel y cafodd ei gyflwyno i'r Pwyllgor Sgriwtini Corfforaethol yn y cyfarfod ar 14 Ionawr i ostwng cymorth

i'r Mudiad Ysgolion Meithrin a Chymdeithas Cylchoedd Chwarae Cyn-Ysgol Cymru. Estynnodd y Cadeirydd wahoddiad i'r Cyfarwyddwr Dysgu Gydol Oes roi eglurhad pellach ar y cynnig o ran ei effaith a'i risgiau posib ac i friffio'r Aelodau ar y sefyllfa ddiweddaraf mewn perthynas â'r datblygiadau diweddar.

Gwnaed y pwytiau isod gan y Cyfarwyddwr Dysgu Gydol Oes;

- Yr angen i gydbwyso gofynion statudol yn erbyn darpariaeth ddewisol wrth nodi arbedion posib fel rhan o'r broses ar gyfer llunio Cyllideb 2014/15. O ran y ddarpariaeth Addysg, rhaid i'r AALI roi 10 awr o addysg i blant 3 oed yn unol â'r gyfraith.
- Gwneir y ddarpariaeth hon yn Ynys Môn trwy gyfuniad o gylchoedd/grwpiau sy'n caniatáu mynediad i blant 3 oed, ac i raddau llai mewn ysgolion cynradd sy'n caniatáu mynediad i blant 3 oed o'r mis Medi yn dilyn eu pen blwydd yn 3 oed gan olygu bod peth dyblygu yn y ddarpariaeth.
- Ar hyn o bryd mae'r Gwasanaeth Dysgu Gydol Oes yn rhoi grant i'r Mudiad Ysgolion Meithrin a'r Cymdeithas Cylchoedd Chwarae Cyn-Ysgol ar gyfer y ddarpariaeth hon.
- Mae'r cynnig ar gyfer arbedion yn golygu gostwng oed mynediad i ysgolion er mwyn caniatáu mynediad i blant yn y tymor yn dilyn eu pen blwydd yn 3 oed ac mae'n ceisio rhoi sylw i'r elfen o ddyblygu. Nid yw'r cynnig yn golygu gostwng y ddarpariaeth ond ei chyflwyno mewn lleoedd gwahanol.
- Er y cydnabyddir y gall bod gan y cynnig oblygiadau mewn perthynas â chyflogaeth leol, fe all, ar y llaw arall, gynhyrchu mwy o gyfleon mewn rhai ysgolion.
- Gall y cynnig hefyd fod yn risg i'r ddarpariaeth ar gyfer plant sy'n 2½ oed yn yr ystyr y byddai'r cyllid i grwpiau MYM dan y trefniadau arfaethedig newydd ar gyfer plant 3 oed yn cael ei ostwng a byddai hynny'n codi cwestiwn ynghylch ymarferoldeb y Cylchoedd o ran eu gallu i gynnal darpariaeth ar gyfer plant 2½ oed yn unig. Tynnwyd sylw at yr elfen risg hon pan gyflwynwyd y cynnig yn wreiddiol.
- Mae ystyriaethau heblaw am ystyriaethau ariannol hefyd yn berthnasol i'r ddarpariaeth Blynnyddoedd Cynnar. Mae'r rhain yn ymwneud ag ansawdd y ddarpariaeth a'r laith Gymraeg a sefydlu sylfaen yn y Blynnyddoedd Cynnar lle gall pobl ifanc ffynnu yn eu defnydd o'r iaith.
- O ganlyniad i'r pryderon a godwyd ynghylch y mater hwn, cynhaliwyd cyfarfod gyda'r Mudiad Ysgolion Meithrin ar y dydd Iau blaenorol pryd cytunodd y ddau barti nad yw'r status quo yn gynaliadwy ac mae'r Gwasanaeth Dysgu Gydol Oes a'r MYM yn awyddus i weithio gyda'i gilydd i gyrraedd dealltwriaeth gyffredin o'r hyn y bydd angen ei wneud.
- Trafodwyd cynllun tymor byr ynghyd â gwerth cael trafodaeth bellach i ddatblygu cynllun tymor hir i sicrhau dyfodol darpariaeth Blynnyddoedd Cynnar sy'n effeithiol ac yn effeithlon. Bydd angen i'r cynllun tymor byr roi blaenoriaeth i arbedion ariannol. Bydd y Gymdeithas Cylchoedd Meithrin hefyd yn rhan o'r trafodaethau hynny.
- Mae'r cynnig i ostwng oed mynediad i ysgolion yn un y mae'r Gwasanaeth Dysgu Gydol Oes yn dymuno parhau i'w ystyried.

Gwahoddwyd Mr Hywel Jones, Prif Weithredwr y Mudiad Ysgolion Meithrin i annerch y cyfarfod a gofynnodd i'r Aelodau ystyried sut y gellir diogelu'r ddarpariaeth Blynnyddoedd Cynnar trwy weithio mewn partneriaeth, yn arbennig felly ar gyfer plant 2-3 oed. Cyfeiriodd at waith y Cylchoedd yn paratoi plant ifanc yn gymdeithasol ar gyfer yr ysgol ac o bersbectif y cyfraniad y maent yn ei wneud o ran cyflwyno plant ifanc i'r iaith Gymraeg. Pwysleisiodd ansawdd y ddarpariaeth gan y Cylchoedd ac fe gefnogwyd hynny mewn adolygiad gan Estyn. Gofynnodd am i'r trafodaethau gyda'r Gwasanaeth Dysgu Gydol Oes barhau er mwyn edrych ar wahanol ffyrdd o drefnu'r ddarpariaeth a gofynnodd am i'r penderfyniad terfynol ar y mater gael ei ohirio hyd nes yr oedd y trafodaethau llawn hynny wedi eu cynnal. Ategodd Miss Carys Gwyn, MYM y sylwadau a wnaed gan Mr Hywel Jones ynghylch gwerth parhau gyda'r trafodaethau a oedd wedi cychwyn y dydd Iau cynt a dywedodd mai nod MYM yn y trafodaethau hynny yw sicrhau darpariaeth blynnyddoedd cynnar ar gyfer plant ifanc Ynys Môn gan mai nhw yw dyfodol yr Ynys.

Rhoddydwyd cyfle i Aelodau'r Pwyllgor ofyn cwestiynau er eglurhad ac amlygwyd ganddynt y byddai wedi bod o fudd pe baent wedi cael eu briffio'n eglurach ynghylch yr hyn yr oedd y Gwasanaeth Dysgu Gydol Oes yn ceisio ei gyflawni gyda'r cynnig i ostwng cefnogaeth i'r MYM a'r Gymdeithas Cylchoedd Chwarae fel y byddant wedi medru ymateb yn well i'r pryderon a godwyd wedyn. Cydnabu'r Aelodau fod trafodaethau'n parhau ac roeddent yn cefnogi parhad y trafodaethau hynny.

PENDERFYNWYD nodi'r sefyllfa a gyflwynwyd a hefyd fod trafodaethau yn parhau.

3.2 Yn unol â bwriad y Cadeirydd bod cynrychiolwyr sgrwtini sy'n gwasanaethu ar fyrddau Rhaglen / Prosiect y Rhaglen Drawsnewid yn diweddarau'r Pwyllgor yn rheolaidd ar gynnydd gyda'r rhaglen drawsnewid, dywedodd y Cynghorydd Llinos Huws, fel aelod o'r Bwrdd Prosiect Moderneiddio Ysgolion, fod y prosiect hwnnw wedi cyrraedd sefyllfa lle 'roedd cynlluniau moderneiddio arfaethedig wedi eu cyflwyno i Lywodraeth Cymru a disgwyli'r ymateb ar ddiwedd mis Chwefror.

4 MONITRO PERFFORMIAD – CERDYN SGORIO CORFFORAETHOL AR GYFER CHWARTER 3 2013/14

Cyflwynwyd i'r Pwyllgor ei ystyried, adroddiad gan y Rheolwr Cynllunio Busnes a Rhaglen yn ymgorffori'r Cerdyn Sgorio Corfforaethol a oedd yn dangos perfformiad yn erbyn dangosyddion allweddol ar gyfer diwedd Chwarter 3 2013/14. Roedd yr adroddiad yn cynnwys sylwebaeth ar ddangosyddion mewn perthynas â Rheoli Pobl, Rheoli Perfformiad a Gwasanaethau Cwsmer.

Cafwyd crynodeb o'r prif negeseuon ynghylch perfformiad yn Chwarter 3 gan y Rheolwr Cynllunio Busnes a Rhaglen fel y cawsant eu hadlewyrchu yn y Cerdyn Sgorio. Tynnodd sylw at welliant a gwaethgiad mewn perfformiad lle 'roedd y rheini wedi digwydd ynghyd â'r rhesymau amdanynt; perfformiad yn erbyn dangosyddion cenedlaethol lle 'roedd yn rhagori ar y perfformiad lleol; camau a gymerwyd i reoli perfformiad a phatrymau sy'n dod i'r wyneb mewn meysydd gwasanaeth allweddol fel y nodwyd yn yr adroddiad.

Rhoddodd yr Aelodau sylw i'r Cerdyn Sgorio a'r dystiolaeth gefnogol a gyflwynwyd a thynnwyd sylw at y materion isod fel rhai yr oeddent yn dymuno cael eglurhad pellach arnynt:

- Holwyd pam nad oedd unrhyw ddata rheoli perfformiad ariannol ar gael ar gyfer Chwarter 3. Nododd yr Aelodau bod angen cydamseru'r amserlenni ar gyfer cynhyrchu gwybodaeth ynghylch rheoli perfformiad ariannol gyda'r amserlenni ar gyfer cynhyrchu gwybodaeth rheoli perfformiad am feysydd eraill. Cytunodd y Pennaeth Swyddogaeth (Adnoddau) a'r Rheolwr Busnes a Rhaglen gan awgrymu y byddai'r fath amserlen wedi ei sefydlu ar gyfer y dyfodol i adrodd ar reolaeth ariannol ochr yn ochr â meysydd eraill.
- Nifer y dyddiau a gollir i absenoldeb salwch ar gyfartaledd. Gyda'r pwysau cynyddol ar y gweithlu mewn amgylchedd o newid a thoriadau, nodwyd bod hwn yn faes y mae angen ei fonitro'n agos. Awgrymwyd y byddai dadansoddiad manylach o'r rhesymau am absenoldeb salwch o fudd i'r Aelodau ddeall y sefyllfa ac fel bod modd rhoi gwell sylw i'r mater er budd y gweithwyr.
- Mynegwyd pryder ynghylch perfformiad a oedd yn is na'r targed mewn perthynas â'r ganran o gyfweiliadau Dychwelyd i'r Gwaith a gynhaliwyd, yn arbennig o gofio eu pwysigrwydd fel ffordd o reoli salwch ac i ddwyn sylw at batrymau o absenoldeb. Roedd y perfformiad gwirioneddol o ran cynnal cyfweiliadau Dychwelyd i'r Gwaith, sef 50% o gymharu â tharged o 90%, yn annerbyniol yn nhyb yr Aelodau a phwysleisiwyd, er gwaethaf cryfder neu wendid y profforma Dychwelyd i'r Gwaith, dylai cynnal cyfweiliadau Dychwelyd i'r Gwaith gael ei weld fel dyletswydd y mae'n rhaid i reolwyr ei chyflawni, yn arbennig os yw'n ddisgwyliad polisi - nododd y Pennaeth Proffesiwn (Adnoddau Dynol) bod perfformiad yn y maes hwn wedi gwella yn y cyfnod o fis Medi i fis Tachwedd 2013 a bod y Cydlynnydd absenoldeb salwch wedi bod yn cefnogi adrannau i reoli absenoldebau salwch. Os oes polisiâu a chanllawiau disgwyli'r bod rheolwyr yn cydymffurfio â nhw. Awgrymodd y Cynghorydd Llinos Huws y gallai Aelodau'r Pwyllgor adolygu'r ffurflen cyfweiliadau Dychwelyd i'r Gwaith a'u dychwelyd wedyn i'r Swyddogion am ystyriaeth bellach.
- Nodwyd y diffyg cydberthynas rhwng absenoldeb salwch ac anafiadau yn y lle gwaith ac awgrymwyd y dylid bod cyswllt rhwng y ddau faes er mwyn darparu darlun cywirach o absenoldebau salwch - dywedodd y Pennaeth Proffesiwn (Adnoddau Dynol) y gellid cael y data o'r System Northgate ar gyfer Rheoli Gwybodaeth ac y byddai'r Gwasanaeth AD yn cydgysylltu gydag Arweinydd y Tîm Iechyd a Diogelwch i sefydlu'r posibilïadau yn hyn o beth.
- Mewn cysylltiad â Gwasanaeth y Cwsmer ac yn benodol yr amser a gymerir i ateb galwadau ffôn awgrymwyd bod system y prif switsfwrdd yn feius oherwydd nad oes iddo gyfleuster i nodi a yw swyddog yn y swyddfa ai peidio ac ar gael i gymryd galwad a thrwy hynny yn ei gwneud yn amhosibl ymateb i'r cyfnodau amser ar gyfer ymateb i alwadau - dywedodd y Dirprwy Brif Weithredwr bod y dechnoleg ar gyfer gwneud hynny yn cael ei dreialu gyda'r nod o'i ymestyn ymhellach yn y man drwy'r Prosiect Gweithio'n Gallach.

- P'un a oedd y gostyngiad bychan iawn mewn perfformiad yn erbyn dangosydd SCC/01 12a a SCC/43a yng nghyswllt y Gwasanaethau Plant yn awgrymu bod y Gwasanaeth o dan bwysau – dywedodd y Pennaeth Gwasanaethau Plant ei bod yn bosibl dehongli'r data mewn gwahanol ffyrdd. Dywedodd iddi wneud dau ddadansoddiad o ran cymharu perfformiad gydag un yr un chwarter y flwyddyn ddiwethaf a hefyd yn erbyn y perfformiad cyfartaleddol yng Nghymru y flwyddyn ddiwethaf. Trwy ddefnyddio'r canllawiau hynny fel hidlydd, y dangosydd ynglyn ag asesiadau craidd (SCC/43a) yw'r unig un sy'n dangos gwaethygiad o ran perfformiad o gymharu â sefyllfa'r flwyddyn ddiwethaf a'r cyfartaledd Cymreig. Mae mater y cynnydd mewn atgyfeiriadau yn cael ei ymchwilio i geisio sefydlu'r cysylltiadau ac mae hyn wedi dangos patrwm yn amrywio dros gyfnod o amser o ran cysylltiadau h.y. y cyswllt cyntaf gyda'r gwasanaeth ac wedyn drosglwyddo'r cysylltiadau hyn yn atgyfeiriadau go iawn. Roedd y dadansoddiad yn awgrymu bod cwestiwn a oedd y cynnydd mewn atgyfeiriadau yn deillio o gynnydd cyfatebol mewn galw neu a oedd oherwydd ymarfer unigol ar y ddesg flaen. Fodd bynnag, bu cynnydd yn nifer y plant y gofelir amdanynt, y rhai sy'n destun achos gofal ac yn nifer y plant ar y Gofrestr Diogelu Plant. Mae'r cerdyn sgorio ym mlwyddyn gyntaf ei weithredu yn erfyn defnyddiol er mwyn amlygu'r materion hyn.
- Mynegwyd siom oherwydd methu'r targed gyda dangosydd SCA/018c ynglyn â % gofawyr oedolion a gafodd asesiad neu adolygiad o'u hanghenion yn ystod y flwyddyn. Nodwyd y bydd cefnogaeth ariannol y Cyngor i allgyrraedd gofawyr yn cael ei ostwng 5.2% ac mae hynny yn achos pryder o ran perfformiad i'r dyfodol - dywedodd y Cyfarwyddwr Cymuned bod y gostyngiad 5.2% mewn cefnogaeth wedi ei wneud yn gyson ar draws y trydydd sector. Mae'r dyraniad o gyllid yn seiliedig ar y ddarpariaeth gyfredol, ac y mae cyfarfod â'r galw mewn cyd-destun o adnoddau sy'n lleihau yn parhau i fod yn sialens ar draws y sector gofal. Bu perfformiad Ynys Môn o safbwynt gofawyr yn eithaf da a thra ei fod yn perfformio'n dda mewn asesiadau mewn perthynas â darpariaeth i ofalwyr, mae lle i wella o hyd yn arbennig o ran cefnogaeth o fewn gofal cymunedol ac ysbaid.
- Awgrymwyd y gellid rhoddi ystyriaeth i gynnwys y raddfa casglu rhent fel un o'r meysydd i'w fesur am berfformiad – dywedodd y Rheolwr Cynllunio Rhaglen a Busnes y bydd y rhaglen gyfredol o ddangosyddion yn cael sylw eto mewn paratoad ar gyfer 2014/15.
- Cwestiynwyd y raddfa casglu Treth Gyngor gyda chyfeiriad arbennig at y targed oedd wedi ei nodi. Dywedodd y Rheolwr Refeniw a Budd-daliadau mai'r ffigwr oedd wedi ei nodi fel targed oedd y perfformiad ar yr un cyfnod y flwyddyn ddiwethaf a bod y raddfa gasglu gyfredol ar y blaen i berfformiad y flwyddyn ddiweddaraf dros yr un cyfnod.
- Cyfeiriwyd at danberfformio yng nghyswllt ymweliadau twristiaeth a gofynnwyd pa gamau oedd yn cael eu cymryd i hyrwyddo twristiaeth mewn ffordd sy'n gyraeddadwy o ystyried ei fod yn ddiwydiant mawr ym Môn - dywedodd y Rheolwr Cynllunio Rhaglen a Busnes bod y data yn y cerdyn sgorio cyfredol wedi dyddio a'i fod yn adlewyrchu'r sefyllfa ym mlwyddyn calendr 2012. Bydd y data ar gyfer 2013 fel gweddill y DU yn cael ei ryddhau yn yr haf 2014.

Penderfynwyd nodi sefyllfa'r perfformiad ar gyfer Chwarter 3 2013/14 fel yr oedd i'w weld yn y Cerdyn Sgorio Corfforaethol.

CAM GWEITHREDU'N CODI : Y Rheolwr Cynllunio Rhaglen a Busnes i adrodd sylwadau'r Pwyllgor Sgrwtini ynglŷn â'r meysydd oedd yn achosi pryder a champau lliniaru posibl, i'r Pwyllgor Gwaith.

5 CAIS AELODAU AM I EITEM GAEL EI HYSTYRIED GAN SGRIWTINI

Rhoddwyd ystyriaeth i gais gan y Cynghorydd Peter Rogers a aseswyd o dan Brawf Arwyddocâd Sgrwtini i'r Pwyllgor Sgrwtini Corfforaethol edrych arno, sef y mater o gau'r B4417 yn y groeslon gyda'r A5 ym Mhentre Berw.

Dywedodd y Cynghorydd Peter Rogers wrth y Pwyllgor ei fod wedi gwneud y cais oherwydd ei fod yn credu ei bod yn bwysig bod cau'r B4417, cyfathrebu gyda thrigolion lleol a busnesau ac effaith y cau hwnnw arnynt, yn ogystal â chostau tebygol y gwaith trwsio yn haeddu cael eu harchwilio'n fanylach gan y Pwyllgor Sgrwtini Corfforaethol er mwyn sefydlu a ellir dysgu gwersi o'r ffordd y deliwyd gyda'r mater.

Cymeradwyodd y Pwyllgor y cais ac roeddent yn credu y dylai'r mater gael ei ymchwilio gan Banel o'i Aelodau.

Penderfynwyd cymeradwyo'r cais a wnaed gan y Cynghorydd Peter Rogers a bod y mater o gau'r B4417 yn y groeslon gyda'r A5 ym Mhentre Berw yn cael ei graffu gan Banel o'r Pwyllgor gyda'r Aelodau canlynol –

Cadeirydd neu Is-Gadeirydd y Pwyllgor

Y Cynghorydd Victor Hughes

Y Cynghorydd Peter Rogers gyda gwahoddiad i fynychu i'r

Cynghorydd Richard Dew fel Deilydd Portffolio Prifffyrdd

CAMAU GWEITHREDU'N CODI : Y Rheolwr Sgrwtini i gydlynu'r broses o alw cyfarfodydd o'r Panel gyda gwahoddiad i'r personél perthnasol i fynychu fel bo'r angen.

6 AMSER CYFARFODYDD

6.1 Dywedwyd bod y Cyngor Sir yn ei gyfarfod a gynhaliwyd ar 27 Ionawr 2014 wedi penderfynu fel a ganlyn ynglŷn â'r mater uchod -

- "Cefnogi galw rhai cyfarfodydd (Pwyllgor Cynllunio a Gorchmynion a'r ddau Bwyllgor Sgrwtini) am 4:00pm a 4:30pm a bod y trefniadau'n cael eu trafod gyda'r Cadeiryddion ac Aelodau'r Pwyllgorau perthnasol a bod adroddiad diweddarau'n cael gyflwyno i'r cyfarfod nesaf sydd wedi ei drefnu o'r Cyngor ar 27 Chwefror 2014.
- Nodi canfyddiadau'r asesiad effaith cydraddoldeb cychwynnol.
- Bod trefniadau'n cael eu treialu am gyfnod o 12 mis gan ddechrau yn Ebrill 2014."

6.2 Cyflwynwyd adroddiad y Pennaeth Dros Dro Gwasanaethau Democrataidd fel oedd wedi ei gyflwyno i'r cyfarfod o'r Cyngor Sir ar 27 Ionawr 2014 er gwybodaeth i'r Pwyllgor.

Ystyriodd yr Aelodau y mater gan ofyn cwestiynau i'r Pennaeth Dros Dro Gwasanaethau Democrataidd mewn perthynas â chefnidir y mater o amseriad y cyfarfodydd gan ofyn faint o ymgynghori a fu. Gwnaed gwahanol awgrymiadau a nodwyd bod yn rhaid i'r Cyngor roi sylw i gyfleon cyfartal wrth drafod y mater hwn ac y gall galw cyfarfodydd ar rai amseroedd h.y. 4:00pm fod yn anfanteisiol i rhai grwpiau e.e. merched gyda phlant.

Yn dilyn trafodaeth, nododd y mwyafrif o Aelodau'r Pwyllgor y byddai'n well ganddynt gadw'r sefyllfa fel ag y mae ac y dylai'r cyfarfodydd o'r Pwyllgor Sgrwtini Corfforaethol barhau i gael ei galw am 2:00pm. Roedd y Cynghorydd Ann Griffith yn dymuno iddo gael ei nodi ei bod o blaid galw cyfarfodydd yn y bore.

Penderfynwyd nodi 2:00pm fel yr opsiwn a ffefrir gan Aelodau'r Pwyllgor Sgrwtini Corfforaethol ar gyfer galw cyfarfodydd o'r Pwyllgor Sgrwtini Corfforaethol.

7 RHAGLEN WAITH

Cyflwynwyd rhaglen waith y Pwyllgor Sgrwtini Corfforaethol hyd ddiwedd mis Ebrill 2014, a'i nodi. Tynnodd y Rheolwr Sgrwtini sylw'r Aelodau at y ffaith y bydd y cyfarfod o'r Pwyllgor ar ddiwedd mis Ebrill wedi gorfod cael ei ddwyn ymlaen fel y gall Pwyllgor graffu ar Adroddiad Gwella'r Cyngor cyn ei gyflwyno i'r Pwyllgor Gwaith ar 22 Ebrill. Dywedodd y Swyddog y bydd gwaith ar ddatblygu blaenraglen waith y flwyddyn nesaf yn dechrau yn bur fuan.

Penderfynwyd bod cyfarfod o'r Pwyllgor Sgrwtini Corfforaethol a gynlluniwyd ar gyfer 28 Ebrill 2014 yn cael ei aildrefnu am y rheswm a roddwyd.

CAMAU GWEITHREDU'N CODI : Y Rheolwr Sgrwtini yn cysylltu gyda'r Cadeirydd i drefnu dyddiad newydd ar gyfer Pwyllgor mis Ebrill.

8 CAU ALLAN Y WASG A'R CYHOEDD

Dan Adran 100 (A)(4) Ddeddf Llywodraeth Leol 1972, gyrrwyd y wasg a'r cyhoedd allan o'r cyfarfod yn ystod y drafodaeth ar yr eitem a ganlyn, oherwydd y tebygrwydd y câi gwybodaeth ei rhyddhau a honno'n wybodaeth y gwna Atodlen 12A y Ddeddf eithriad ohoni fel y diffinnir y wybodaeth yn y Ddeddf ac yn y Prawf Budd y Cyhoedd sydd ynghlwm".

9 DILEU DYLEDION

Cyflwynwyd adroddiad gan y Rheolwr Refeniw a Budd-daliadau ar ddyledion yr argymhellir eu dileu a hefyd ddogfennau cysylltiol i'r Pwyllgor eu hystyried a rhoi ei sylwadau cyn y byddai'r Swyddog Adran 151 a'r Deilydd Portffolio yn ymarfer eu pwerau dirprwyedig ynglŷn â hwy.

Rhoddodd y Rheolwr Refeniw a Budd-daliadau gefndir a chyd-destun y gofynion casglu ac adennill dyled mewn perthynas â threth y Cyngor, cyfraddau busnes, budd-daliadau tai a rhent tai. Roedd yr Aelodau eisiau cael eglurhad ar faterion mewn perthynas â dyledion drwg ac fe wnaed y sylwadau canlynol gyda golwg ar wella'r sefyllfa -

- Yr angen i gyflymu prosesau ariannol a chyfreithiol a gweithdrefnau ar gyfer adennill dyled fel nad yw dyledion yn parhau heb gael sylw am gyfnod hir o amser.
- Yr angen i dynhau gweithdrefnau gweinyddol a hefyd drosolwg fel na fydd gordaliadau'n digwydd.
- Yr angen i adolygu arferion gorfodaeth er mwyn lleihau costau yn y maes hwn.

Penderfynwyd nodi'r sefyllfa yng nghyswllt y dyledion a argymhellwyd i'w ddileu ynghyd â'r sylwadau a wnaed arnynt.

**Y Cyngorydd Gwilym O. Jones
(Is-Gadeirydd yn y Gadair)**